

鼓山志卷四

郡守李拔鑒定

郡人黃任脩輯

張伯謨叅訂

沙門四

自范史立方技傳晉唐以來因之於是佛圖澄鳩
摩羅什明崇儼桑道茂之徒昭垂正史要其清標
拔俗各有宗傳不可不因其教推而進之也茲寺
自華嚴開山興聖宣教行爲曹溪正脉嗣法有人
鼓山志 卷四

唐

華嚴開山靈嶠禪師未知何許人先是鼓山有毒龍
每作風雨損人禾稼建中四年郡從事裴胄請師
遣之師入山誦華嚴於潭傍龍出聽法遂引去裴
公乃奏請立寺賜名華嚴

五代

湧泉第一代興聖國師諱神晏大梁人姓李氏幼惡

葦籊樂聞鐘梵年十二時有白氣騰所居屋壁師
卽書壁曰白道從茲速改張休來顯現作妖祥定
祛邪行歸真見必得超凡入聖鄉題罷氣滅年志
學邁疾甚亟夢神人與藥覺而頓愈明年又夢梵
僧告曰出家時至矣遂依衛州白鹿山道規禪師
披削往嵩岳受具謂同學曰白四羯磨後全體戒
定慧豈準繩而可拘也於是徧叩禪關但滯於語
言知解乃造雪峰峰知其緣熟忽起搗住曰是甚
麼師釋然了悟亦忘其了心唯舉手搖曳而已峰

曰子作道理耶師曰何道理之有峰審其懸解撫
而印之梁開平二年閩王奏立鼓山湧泉禪寺具
百戲香花請雪峰請師住持仍奏賜紫衣號定慧
大師後閩主延鈞加號廣辯圓覺興聖國師僧問
如何是鼓山師曰衆岳難偕曰還許學人躡也無
師曰汝試下足看問如何是鼓山正主師曰瞎作
麼問如何是向上關楨子師便打問如何是包盡
乾坤句師曰近前來僧近前師曰是甚麼曰不會
乞師指示師曰去鈍置人作麼問作何方便得紹

師宗師曰岸谷無風徒勞展掌上堂曰今爲諸仁者刺頭入他諸聖化門抖擻不出所以向仁者道教排不到祖不西來三世諸佛不能唱十二分教載不起凡聖攝不得古今傳不得忽爾是箇漢未通箇消息向他道被他驀口擱還恠得他麼雖然如是也不得亂擱鼓山尋常道更有一人不跨石門須知有不跨石門句作麼生是不跨石門句鼓山住此山三十餘年五湖四海來者未見有一人快利如今還有麼也不昧兄弟珍重天福四年六

鼓山志

卷四

三

月十一日示寂閩主爲建塔於桐口沙溪之原顯德五年移建本山上方

傳燈

第二代了覺大師諱智嚴姓卓氏本縣康山人叅興聖國師得其法居第一座天福四年興聖遷化舉代其席上堂曰多言復多語由來返相誤僧問石門之句卽不問請師方便師曰問取露柱問國王出世三邊靜法王出世有何恩師曰還會麼曰幸遇明師輒伸呈獻師曰吐却著曰若不禮拜幾成無孔鐵鎚師曰何異無孔鐵鎚周顯德六年退休

於東山眠雲寺後示寂茶毘得舍利建塔於眠雲
傳燈

第三代了宗大師諱智岳姓高氏本里人初入鼓山
禮國師披削後遊方至鄂州黃龍問曰久嚮黃龍
到來只見赤斑蛇龍曰汝只見赤斑蛇且不見黃
龍師曰如何是黃龍曰滔滔地師曰忽遇金翅鳥
又作麼生曰性命難存師曰恁麼則被吞却也曰
謝闍黎供養師未省尋歸鼓山舉似國師國師爲
啓發始悟厥旨顯德六年次補本山爲第三世上

鼓山志

卷四

四

堂曰我若全舉宗乘汝等向甚麼處領會所以向
汝道古今常露體用無妨僧問諸餘卽不問如何
是誕生王種師曰金枝玉葉不相似時作麼生曰
恁麼卽同中不得異師曰不得異事作麼生曰金
枝爭能續師曰猶是闔外之辭問虛空還解作用
也無師拈拄杖曰這箇師僧好打僧無語乾德五
年五月初十日遷化卽沙溪國師塔之舊址封樹

焉
傳燈

宋

第四代了悟空曉禪師諱清鶚姓林氏郡城人禮興聖國師剃度于國師言下朗符厥旨乾德五年次補當山僧問亡僧遷化向甚麼處去師曰時寒不入手淮海王公聞師德化奏賜紫衣師號雍熙二年正月十日臨入寂說偈曰吾愛鼓碕深急水足多魚鼈止其間以石墜籃沉到底打船歸去一時閒門人遵遺命沉鼓碕江魚鼈不食異時漁人得之因闍維塔於鹽嶼後移鼓碕山之陽從舊愛也

傳燈

鼓山志

卷四

五

第五代清球禪師姓王氏泉州人禮國師薙落問如何是不跨石門句國師云門外漢師當下知歸開寶九年郡守移補本山雍熙三年十月初四日示寂塔於本山後移入歷代祖塔

第六代法廣禪師姓上官永福人禮當山了覺大師披削後得法了宗大師居第一座雍熙四年郡守請主當山淳化四年退居千福寺八月初七日示寂塔於千福

第七代法謙禪師姓上官永福人禮了宗大師薙落

淳化四年郡守請住當山咸平四年退居羅漢末壽院次年七月十四日示寂

第八代常遵禪師姓鄭氏本縣人嗣當山宗曉大師咸平四年郡守延住本山復移天王寺乾興元年郡守陳公再移主本山天聖元年三月十二日示寂建塔於沙溪之原後移歸本山歷代祖塔

第九代圓應禪師姓歐陽永福人本山披薙叅臥龍安國法空大師得其法嘗到林陽值端禪師將入寂陞堂辭衆師出問曰雲愁霧慘大衆嗚呼請師

鼓山志

卷四

六

一言未在告别端垂一足師曰法鏡不臨於此土寶月又照於何方端云非公境界師曰恁麼則漚生漚滅還歸海師去師來是本常端長嘘一聲師便禮拜大中祥符三年嚴公請主本山明年十月十六日示寂塔於本山香爐峰之東北後移入歷代祖塔

第十代如或禪師姓陳氏郡城人初從本山了覺大師披削後嗣其法大中祥符四年郡守李公請住茲山乾興元年九月初十日示寂墓本山羅漢臺

東南後移八歷代祖塔

第十一代賜紫常恪大師姓孫氏懷安管源人嗣當山宗曉禪師天聖二年郡守陳公移補當山明道二年相國王公聞師德風奏賜紫衣慶歷四年退居乾元藏院次年歸水月堂八年十一月五日泥洹茶毘得舍利葬於桐口沙溪後移本山歷代祖塔

第十二代德建禪師姓潘氏本縣人得法於等覺真一禪師慶歷四年郡守禮部王公請住茲山皇祐

鼓山志

卷四

七

元年重建大殿二年正月移主東山報慈後歷主開元林陽延祥雪峰靈峰後移法海八月初八日遷化

第十三代賜紫慶麟大師姓林氏福城人幼入本山薙落後得法於怡山真行禪師皇祐二年郡守成公請住茲山始作列祖聯芳集治平元年閏五月十八日泥洹塔于本山香爐峰北後移入歷代祖塔

第十四代啓壽禪師姓柳氏漳州人嗣潭州北禪崇

聖院賢禪師郡守元公請住支提後移主城中仁王寺治平元年六月請住茲山後二年移福清靈石終

第十五代德蓀禪師姓楊氏福清人嗣大乘寺曉禪師治平二年郡守張公請住茲山元豐二年正月二十九日坐化逾七日荼毘牙齒舌根不壞建塔本院西北隅後移入歷代祖塔

第十六代定慧大師諱顯宗姓楊氏永福人嗣靈峰院澄禪師元豐二年郡守孫公請住茲山元祐元

鼓山志

卷四

八

年恩賜紫衣師號紹聖元年閏四月十九日示寂建塔本院西北隅後移入歷代祖塔

第十七代祖月大師諱善譽姓凌氏懷安人嗣雪峰敦禪師元祐八年郡守王公請住茲山奏賜紫衣師號紹聖四年十二月二十四日坐化荼毘得舍利

建塔雪峰

傳燈

第十八代圓覺大師諱潛洞姓楊氏江南人嗣東京智海佛印清禪師元祐間郡主學士許公請住城中慶城寺紹聖元年端明學士王公請住茲山奏

賜紫衣師號大觀三年二月十九日示寂塔於本院西北隅後移入歷代祖塔

第十九代有需禪師姓洪氏莆田人嗣洪州泐潭寶峰乾和尚大觀三年權府提刑陳公請住茲山宣和六年閏三月初五日供佛辭衆吉祥而逝卽東

菴作舍利塔

續傳燈

第二十代禪鑒大師諱體淳姓林氏莆田人嗣吉州祥符寺立和尚神光政和二年權府提刑邵公請住茲山上堂曰由基弓矢不射田蛙任氏絲綸要

鼓山志

卷四

九

投溟渤發則穿揚破的得則脩鯨巨鼉隻箭旣入重城長竿豈釣淺水而今莫有吞鈎齧鏃底麼若無山僧卷起絲綸拗折弓箭去也擲拄杖下座宣和元年八月白雲廨院災師重構之五年復災師復構如前建炎三年移主靈石四年移主東山大乘紹興元年待制陳公又移歸本山十七年十月十五日坐化遺言勿火全身塔於寺北待制陳公命名寂光塔

第二十一代慶璋禪師姓王氏候官人嗣本山有需

禪師建炎三年給事江公請住茲山紹興十四年
五月二十七日告終建塔於白鹿山

第二十二代木蛇禪師諱邦靖姓阮氏寧德人大觀
中受業杭州天竺徧參名宿後得法於雪峰有需
禪師居第一座紹興二年安撫程公請住當山陞
堂說法嘗握木蛇故號木蛇禪師五年五月十九
日方中集衆陞堂元機雷動退席而寂茶毘葬靈
骨於海會塔之正位

第二十三代竹菴禪師諱士珪自稱老禪成都史氏

鼓山志

卷四

十

子年十八依大慈宗雅落髮醉心楞嚴南遊謁諸
名宿到舒州龍門以所得白佛眼眼曰汝解心已
極但欠著力開眼耳遂俾職堂司一日侍立次問
云絕對待時如何眼曰如汝僧堂中白椎相似師
罔措眼至晚抵堂司師理前話眼曰聞言語師於
言下大悟宣和二年出世和之天寧未幾佛眼謝
事褒禪九月朝旨以師補之靖康改元江州漕使
方郎中請住廬山東林後以兵亂避地閩中乾元
六年判府給事張公以本山丁勲公不舉之後特

請師振之師至衆緣輻輳百廢竝舉上堂曰萬年
一念一念萬年和衣泥裏覩洗脚上牀眠歷劫來
事祇在如今大海波濤湧小人方寸深拈起拄杖
云汝等諸人未得箇入頭須得箇入頭既得箇入
頭須有出身一路良久云雪壓難摧澗底松風吹
不動天邊月上堂萬機不到眼見色耳聞聲一句
當陽頭戴天脚踏地汝諸人祇知今日是五月初
一殊不知金烏夜半忙忙去玉兔天明上海東上
堂曰明明無悟有法卽迷諸人向這裏立不得向

這裏住不得若立即危若住卽瞎直須意不停元
句不停意用不停機此三者既明一切處不須管
帶自然現前不須照顧自然明白雖然如是更須
知有向上事久雨不晴咄下座十二年詔住溫州
鴈宕山能仁寺方至其徒失火鞠爲煨燼師就樹
縛屋陞座示衆曰愛閒不打鼓山鼓扱老來看鴈
蕩山傑閣危樓渾不見溪邊茅屋兩三間還有共
相出手者麼喝一喝下座聽法檀施併力營建未
幾復成寶方十五年詔移住龍翔明年七月十九

日沐浴聲鐘集衆就座泊然而逝茶毘日送者均
獲舍利門人分得靈骨歸葬鼓山歷代祖塔正位
續傳燈

第二十四代圓覺大師諱宗演恩州人姓崔氏年二
十依本州祖印院滿禪師薙度徧歷禪席後還依
滿受其心法政和八年八月詔住上都天寧宣和
改元召入內殿談元稱旨賜紫衣師號頒告金檀
卽右街鑒義後上章乞歸山林得旨出闕屢典名
藍十三年闕帥府葉觀文請住當山上堂僧問不

鼓山志

卷四

三

慕諸聖不重已靈時如何師曰款出囚口曰便恁
麼去時如何師曰換手搥胸問如何是大善知識
心師曰十字街頭片瓦子上堂曰遣迷求悟不知
迷是悟之鉗鎚愛聖憎凡不知凡是聖之爐鞴祇
如聖凡雙泯迷悟兩忘一句作麼生道半夜彩霞
籠玉象天明峰頂五雲遮十五年春葉觀文以雪
峰招師不就俄觀文被召三月安撫莫公復力請
方從辭衆日僧問如何是臨岐一句師曰有馬騎
馬無馬步行曰途中事如何師曰賤避貴居雪峰

期年而寂塔於舊院之西

續傳燈

第二十五代佛心大師諱本才長溪人姓姚氏年十九依地藏志平剃度受具後至大中海印隆禪師處領淨頭一夕印夜叅師至遇結座擲拄杖曰了卽毛頭吞巨海始知大地一微塵師忽然有省出閩徧訪至靈源凡入室出必揮淚一日告源曰此事我見得甚分明祇是臨機吐不出若爲奈何源曰須是大徹方得自在也未幾觀鄰案僧讀曹洞廣錄至藥山採薪歸有僧問甚處來山曰討柴來

鼓山志

卷四

三

僧指腰下刀曰鳴剝剝是箇甚麼山拔刀作斫勢師忽大悟擲鄰僧一掌揭簾趨出衝口說偈曰徹徹大海乾枯虛空迸裂四方八面絕遮欄萬象森羅齊漏泄源撫而印之後應潭帥曾公命出世上封屢遷名刹紹興十五年安撫莫公請住當山衲子輻輳常五千指上堂曰達摩未來東土以前人懷媚水之珠箇箇抱荆山之璞可謂壁立千仞及乎二祖禮却三拜之後一一南詢諸友北禮文殊好不丈夫或有一箇半箇不求諸聖不重已靈

疋馬單鎗投虛置刃不妨慶快生平如今有麼自
是不歸歸便得五湖煙景有誰爭上堂宗乘提唱
妙絕名言一句該通乾坤函蓋直似首羅正眼豎
亞面門又如圓伊三點橫該法界乃卓拄杖曰向
這一點下明得出身猶可易脫體道應難又卓拄
杖曰向第二點下明得縱橫三界外隱現十方中
又卓拄杖曰向第三點下明得魚龍鑽戶佛祖潛
蹤不然放過一著隨分有春色一枝三四花庚午
十二月二十二日夜書偈告寂茶毘建塔本山歷

代祖塔之西歲久塔圯崇禎壬午住山元賢移於
香爐之前

第二十六代別峰禪師諱祖珍興化林氏子少落髮
受具遊方參佛心得旨至鼓山充座元及紹興壬
申延主鼓山僧問趙州遶禪牀一匝轉藏經已竟
此理如何師曰畫龍看頭畫蛇看尾曰婆子云此
來請轉全藏爲甚祇轉半藏此意又且如何師曰
人無遠慮必有近憂曰未審甚麼處是轉半藏處
師曰不是知音者徒勞話歲寒上堂向上一路千

聖不傳卓拄杖曰恁麼會得十萬八千畢竟如何
桃紅李白薔薇紫問著春風總不知明年泉守招
師住法石後移承天示寂

續傳燈

第二十七代蓬菴禪師諱宗逮姓林氏寧德人依龜
山圓明師披削後叅東禪岳禪師契旨舉充座元
紹興甲戌權府提刑趙公請住當山上堂云世尊
道應如是知如是見如是信解不生法相遂喝云
玉本無瑕却有瑕已卯秋暴雨小頂發洪上下二
院屋舍俱壞師脩復之丁亥臘月二十二日無病

鼓山志

卷四

五

書偈告寂全身塔於本山羅漢臺之石

續傳燈

第二十八代山堂禪師諱僧洵長溪阮氏子年十五
依西禪海印隆剃落受具遊方叅諸老宿後歸閩
叅鼓山佛心才禪師領其微旨紹興壬申出世靈
石移白鹿戊子移鼓山上堂黃蘗手中六十棒不
會佛法的的大意却較些子大愚肋下築三拳便
道黃蘗佛法無多子鈍置殺人須知有一人大棒
驀頭打他不回頭老拳劈面搥他不顧且道是
誰上堂朔風掃地卷黃葉門外千峰凜寒色夜半

烏龜帶雪飛石女溪邊皺兩眉卓拄杖云大家在這裏且道天寒人寒喝一喝云歸堂去庚寅八月三日示寂建塔本山祖殿之西崦

續傳燈

第二十九代石菴禪師諱師瑤永福人年十三依福清地藏然禪師剃度後於東禪思岳禪師言下契旨乾道庚寅陳丞相請住當山嘗頌百丈野狐話曰大雄山下老狐精千古叢林惱殺人若遇金毛獅子子看伊無處著渾身頌魯祖面壁曰家財喪盡沒絲毫秣箇渾身猶恨多却向池陽最深處殺

鼓山志

卷四

六

人空手不持刀頌栢樹子曰庭前栢樹子一二三四五竇八布衫穿禾山解打鼓叢林競傳之其年十二月初六日示寂坐七日顏貌如生荼毘葬本

山歷代祖塔

續傳燈

第三十代木菴禪師諱安永郡城人姓吳氏少依安國寺覺和尚剃度謁懶菴需於雲門一日入室菴曰不問有言不問無言世尊良久不得良久處會隨後便喝師倏然契悟作禮曰不因今日問爭喪目前機菴許之辛卯陳丞相請住當山上堂要明

箇事須是具擊石火閃電光底手段方能嶮峻巖
頭全身放捨白雲深處得大安居如其覷地覓金
針直下腦門須迸裂到這裏假饒見幾而變不犯
鋒鏃全身獨脫猶涉泥水祇如本分全提一句又
作麼生道擊拂子曰淬出七星光燦爛解拈天下
任橫行上堂舉睦州示衆云諸人未得箇入處須
得箇入處旣得箇入處不得忘却老僧師曰恁麼
說話面皮厚多少木菴則不然未得箇入處須得
箇入處旣得箇入處直須颺下箇入處始得上堂

拈拄杖曰臨濟小厮兒未曾當頭道著今日全身
放憨也要諸人知有擲拄杖下座僧問須彌頂上
翻身如何師曰未見毛頭星現曰恁麼則傾湫倒
嶽去也師曰莫亂做僧便喝師曰雷聲浩浩雨點
全無寂於泉州清果院門人奉靈骨塔於本山歷
代祖塔之右

續傳燈

第三十一代寒巖禪師諱道升建寧人姓吳氏叅佛
智裕於育王得其法出世泉州延福乾道癸巳遷
主當山上堂喝一喝曰盡十方世界會十世古今

都盧在裏許畝畝塞塞了也若乃放開一針鋒許則大海西流巨岳倒卓龜鼈魚龍蝦蟃蚯蚓盡向平地上湧出波瀾游泳鼓舞然雖如是須向百尺竿頭自進一步則步步踏轉無盡藏輪方知道鼻孔搭在上唇眉毛不在眼下還相委悉麼喝一喝曰切忌轉喉觸諱淳熙三年四月十六日示寂全身塔於本山香爐峰之下

續傳燈

第三十二代夢堂禪師諱守愚羅源人年十八依隆興寺炤大師得度嗣東禪蒙菴岳禪師淳熙丙申鼓山志

卷四

六

陳丞相請住本山戊戌六月初五日無疾坐化塔全身於洪塘莊

第三十三代小菴禪師諱德最寧德人姓薛氏年十七依平江靈巖訥和尚剃度得其法淳熙五年沈樞密請住鼓山經七載脩廢整頽叢林爲之一新甲辰年微恙告寂全身塔於解院後山

第三十四代直菴禪師諱元嗣郡城程氏子年十四出家仁王寺嗣大心謨和尚乾道辛卯出世建寧靈石遷大同梁丞相請住神光甲辰帥府趙侍郎

移主鼓山朱晦翁先生雅重之淳熙己酉年十二月示寂奉全身塔於積翠菴

第三十五代海菴禪師諱南瑩閩縣人姓周氏年十四依彌勒院得度叅蒙菴岳和尚紹熙庚戌帥府馬大卿請主當山甲寅年十一月十日示寂葬於舊院之東

第三十六代孤峰禪師諱惠深閩縣赤嶼人姓馮氏年十四依大乘佛心和尚剃落叅大洪預和尚得旨紹熙癸丑住持當山嘗示衆云未得入頭應須

鼓山志

卷四

九

切入頭已得須教徹雖然得入本無無莫守無無無間歇大洪聞之曰深兄說禪若此惜福緣不稱耳嘉泰甲子五月普說罷揮偈辭衆以筆一拍而化葬於三昧塔院

續傳燈

第三十七代檜堂禪師諱祖鑒懷安徐氏子禮建康鐘山真禪師薙度歸閩叅乾元宗穎禪師始得大事了畢出世滁之瑯琊慶元己未帥府葉公請住當山凡七載開熙乙丑謝事明年五月示寂塔本山西畚

第三十八代芥菴禪師諱慧意長樂人姓元氏依潤州金山別峰印禪師得度咨決心要徧參名宿未遊密菴傑復菴封之門出世福之東禪開禧乙丑移主當山閱四載退居南菴嘉定己巳七月二十九日示寂葬本山歷代塔

第三十九代自牧禪師諱行謙潼州郿縣人年十九受業於本縣妙音寺二十三出蜀徧遊叢席嘉定己巳太師文昌倪公請主當山閱十四載壬午歲移主雪峰丙戌正月示寂茶毘獲舍利歸葬本山

鼓山志

卷四

三

歷代塔

第四十代枯禪禪師諱自鏡長溪人姓高氏徧參諸方得法於密菴傑公出世寧德鳳山嘉定癸未移鼓山鑄洪鐘有掛鐘偈曰一模脫就轉風流平地教他不肯休要得洪音喧宇宙直須更上一層樓紹定己丑移真州北山後移天童甫至而寂建塔天童嘗頌賓頭盧見佛曰尊者當年親見佛眉毛策起有來端頂門截瞎金剛眼恩大難耐雨露寬頌韓文公見大顛曰省要之言伸一問宗師據坐

不輕酌無端醉後添杯酒惱亂春風卒未休頌般
若柔新羅人草鞋曰龜毛拈得笑哈哈一擊萬重
關鎖開假使蠟人似冰結當甚新羅人草鞋

續傳

第四十一代廣慧禪師諱德融依建康保寧嗣菴和
尚祝髮徧叅尊宿得法於平江萬壽禮禪師出世
蘇之能仁嘉熙戊戌曹帥請住當山丙午春少保
孟相奏賜紫衣師號淳祐丁未五月二十日示寂
茶毘獲舍利藏歷代塔

鼓山志

卷四

三

第四十二代北山禪師諱宗信羅源人姓黃氏年十
五出家於臨安楊墳寺二十二剃度首謁淨慈晦
翁明和尚不契繼聞同行遯菴和尚說法於月窟
往邨之未幾發明大事淳祐丁未趙文昌請開法
本山壬子四月示寂茶毘獲舍利歸葬本山歷代
塔

第四十三代不羣禪師諱清越候官陳古靈先生之
裔得度於東禪融菴坦禪師早歲遊方歷叅名宿
淳祐庚戌比山和尚遷雪峰次年府帥趙公請主

本山庚申三月示寂闍維牙齒不壞塔於黃坑積翠菴

第四十四代無行禪師諱達真連江人姓鄭氏早歲依法林剃度得法於常州華藏淳菴禪師寶祐丙辰趙平齋請主當山癸亥正月十五日示寂建塔本山歷代祖塔左

第四十五代無關禪師諱普門字圓證明州慈谿人姓夏氏年二十一得度於婺州中峰靖禪師後叅徑山無准禪師充藏主因而嗣焉初出世杭州石鼓山志

卷四

三

室寶祐五年丁巳大帥史端明請住當山壬戌六月告寂葬於牛坑瑞巖塔旁

第四十六代月庭禪師諱至華蘭谿人姓劉氏年二十得度於衢州石壁寺嗣石田法薰禪師淳祐丙午出世福之石泉景定辛酉馬樞密延住當山開元九年辛酉十月三日示寂葬於祖塔

第四十七代佛慧愚谷禪師諱元智長溪人姓薛氏年十八出家依邑之湛然本禪師二十受具往叅枯禪鏡公於鳳山後叅少林崧於北山掌記及少

林移徑山鏡公嗣其席師仍掌記俄而契機萬境
如如大帥竹居王公請住本山咸淳丙寅正月十
七日趺坐書偈而化塔於本山南院林希逸撰塔
銘

第四十八代介石禪師諱法琪閩安鎮人姓吳氏少
遊江浙依常州華藏淳菴禪師爲侍者得其法歸
閩住東山報國咸淳乙丑請住當山師歷主數寺
莫非繼廢具興戊辰謝事乃於法堂西畔葺菴以
居德祐乙亥六月十一日入寂葬於本山歷代塔

鼓山志

卷四

三

第四十九代皖山禪師諱正凝舒州太湖人姓李氏
受業於黃州雙泉叅方入閩謁孤峰秀於莆之囊
山執侍五載盡得其奧旨寶祐間出世本州釣龍
臺遷萬歲己巳大帥徐侍郎以此山招致住六載
衆嘗萬指咸淳甲戌臘月八日示寂茶毘數珠不
壞獲舍利於齒中乃別建舍利塔而靈骨葬歷代
塔嘗頌世尊入滅以手摩胸話曰老倒瞿曇不識
羞臨行猶自逞風流摩胸示衆歸何處啼鳥一聲
山更幽頌金峰枕子話曰天作孽猶可違自作孽

不可道頌德山叅龍潭曰潭不見龍不現全身已
在空王殿夢回忽聽曉鶯啼春風落盡桃花片
第五十代石室禪師諱彌堅閩清人姓陳氏肄業永
福靈峰後徧叅諸大老得法於孤峰秀禪師傅五
祖演衣竟以付師甲戌年鼓山虛席趙帥以師補
之明年劄到始領院事時丁宋南遷其年臘月朝
旨增廣城堞命師爲東門提督照產增城六十丈
明年城堞告成而歸俄得疾十月七日示寂其所
傳衣囑留鎮山門茶毘葬本山祖塔

鼓山志

卷四

五

元

第五十一代佛鑒圓照大師諱俊明連江人姓阮氏
年十二棄俗依古田大吉寂照光和尚薙度受具
宋景定間出世閩清禪林至元十年冬元朝開國
大帥王積翁請住本山堂中不下五千指二十二
年臘八大帥開西番戒於杭州移文請師與焉明
年楊總攝舉師補雪峰席仍奏聖旨與師護持賜
號佛鑒圓照元貞改元詔諸山朝京師至通州告
寂弟子奉靈骨回葬本山南院明年奉帝師法旨

賜號普光之塔

第五十二代佛慧妙辯平楚大師諱光聳福寧人姓鄭氏年十五依寧德際山淮翁和尚剃度受具宋淳祐間偃溪和尚住徑山法席大盛師往叩之遂見器重出世建寧寶林歷主名利至元二十三年楊總攝舉師住當山凡十一載元貞元年朝京面奉聖旨住雪峰賜號佛慧妙辯四年十月初一日示寂弟子奉靈骨回葬本山舍利窟下乃師在日所自營者

鼓山志

卷四

五

第五十三代慈濟廣辯佛心在山大師諱道傑福清翁氏子年十四出嶺依池州離垢寺靜和尚剃度十六遊方徧參名宿咸淳間入雪竇簡翁之室大德改元詔北觀面奉聖旨住當山歷一十八載山中頽廢悉皆脩舉延祐乙卯十月得微恙召兩序分付畢泊然而逝奉全身葬於普度塔院

第五十四代正宗頽悟海翁禪師諱如山閩縣人姓陳氏大德丙午禮在山和尚爲師元統甲戌諸道立廣教府以統僧乃請住當山以兼之未幾遂專

其席住持一十八載寺宇爲之一新奉旨特賜紫衣師號至正癸巳讓席與不傳和尚乙未二月七日示寂全身葬南山仁壽寺塔師在日所自建者第五十五代慧燈普照不傳大師諱崇祖閩縣人姓林氏年二十依長樂光嚴寺海翁和尚剃落受具元統癸酉出世本縣廣明寺至正十三年請住當山聞望遠著卿相咸皆禮重由是聲徹禁中朝廷特賜璽書褒美護持仍賜紫衣師號故寺門有不便者皆得理而直之白雲廨院爲寇所焚師重創鼓山志

卷四

美

之規模視昔有加亦爲一代之盛事云癸卯年示寂葬歷代祖塔

明

第五十六代圓照用明大師諱懋訶連江人姓林氏幼從族叔希照光和尚出家後禮隆興府正宗匡禪師薙度少有才名參育王徑山皆掌其記未幾出世宣州李山嗣季潭泐公遷明州香山洪武二年立善世院總治四海僧徒授劄住當山甲寅七月示寂於明州永樂寺建塔永樂

第五十七代虛菴禪師諱普淨姓竇氏潤州丹徒人
依郡之大聖院薙落洪武乙卯於金山契旨壬戌
謁真樂和尚於靈谷重印前解丁卯僧錄司以鼓
山虛席公鬪受劄住持癸酉擇師爲高行僧被旨
祀於廬嶽未逾年奉詔陞住雞鳴寺洪武甲戌年
示寂靈骨塔於雞鳴寺

第五十八代獨芳禪師諱宗繁閩縣陳氏子年十六
從本山光巖和尚得度出嶺參天界寺芳林和尚
洪武壬戌舉住舒州浮山己巳本府僧綱舉送教

鼓山志

卷四

七

府考中住持當山壬午示寂葬歷代祖塔師擅詩
名與郡人唐震王褒周元王偁爲友多所唱和有
詩集行世

第五十九代了心禪師諱善緣候官姚氏子七歲依
城東寶峰菴無塵和尚出家參鼓山藍田和尚後
住南京靈谷寺禮僧錄闡教幻居大師永樂三年
鼓山虛席領檄住持建千佛閣五年春有詔建廣
薦大會於蔣山徵天下名僧師應詔入京說法稱
旨恩賚甚渥復蒙佛輪大寶法王師贈號成就幢

秋歸舉任本府都綱後寺遭回祿重建祖殿方丈法堂及諸寮舍宣德庚戌布政司譙樓及還珠閣壞官延師募緣重建明年秋告成而歸十月得微恙十九日沐浴更衣口占生平履歷命侍僧書之所積金穀擬建大殿及三門者悉以囑其徒文宥語畢而寂塔於獅峰

第六十代簡翁文宥禪師莆田人姓鄭氏早喪父稍長禮了心和尚得度叩心要於鐘山潔菴映公得其旨及了心將遷化乃俾任院事以所積金穀授

鼓山志

卷四

天

之囑蓋造大殿及三門教府申達僧錄司考中劄之次年蓋造大殿併殿前砌起月臺建三門爲飛錫閣上供諸應真下塑四大天王天順改元正月望日遷化壽五十三臘三十一建塔於西菴

第六十一代重開山無異大師名大艤一名元來龍舒沙氏子早歲禮五臺通和尚落髮往叅無明和尚於寶方閱傳燈有省往見寶方復茫然自失居兩月一日隨方至玉山聞護法神倒劃然絕解以偈呈方方曰子但到門矣一日見人上樹始大徹

走至寶方方問曰近日何如師曰却有一條活路只是不許人知方曰因甚不許人知師曰不知不知方乃舉婆子燒菴及龍吟霧起公案詰師師皆頌出方乃曰今日方知吾不汝欺也後隱信州博山學者輻輳遂成叢席衆請開法宗風大震衆至盈千天啓丁卯閩鼓山僧衆議合一爲叢林曹能始觀察率衆鄉紳請師主之師至立職事荆繩規開堂說法雷厲風行上堂曰春日乍寒乍暖春風倏有倏無若從這裡會去佛法天地懸殊不從這

鼓山志

卷四

裏會去向甚麼處會纔涉思惟成羣作隊不思惟處又如何行人更在青山外卓柱杖下座居六閱月而歸崇禎庚午九月十八日示寂建塔博山壬午歲鼓山衆請師衣鉢建塔於香爐峰前

第六十二代雪關禪師諱智闇上饒傅氏子八歲出家因閱壇經見火燒海底句心大疑遂往叅博山山示以船子藏身公案默究久之偶見槽廠拽磨忽磨鼻脫有省作偈呈山山曰子可叅禪也山一日指衲衣令師作頌師援筆立成五頌山曰汝偈

固佳但風骨太露耳須知宗門語句如滿口含氷
不會道著水字復曰子根太利須是死却全心始
得師再拜受教卽閉關六載關中置大鏡一面日
對跏趺纔覺業識心動便指鏡中人唾罵旣久收
放自由作雪關歌山見之擊節稱善乃爲師開關
壬申曹能始觀察請開法當山解制上堂曰諸兄
弟九十日期今已滿閉門作活事如何不會捏殺
獼猴子重疊關山未易過大抵末法禪期真叅罕
遇縱他意樹抽枝不見心花成片雖然如是冷灰
裏豈無一粒豆爆還有不跨石門扶豎晏祖門風
者麼如無且向蘆花深處宿月明穿過釣魚臺未
幾示寂建塔博山

國朝

第六十三代末覺禪師諱元賢建陽蔡氏子幼業儒
補邑諸生年四十棄妻孥往壽昌禮無明和尚出
家密受心印崇禎甲戌聞谷大師推主當山百廢
俱興其法席之盛與與聖無異詳如行堂記順治
丁酉十月七日遷化世壽八十僧臘四十有一塔

鼓山志

卷四

三

全身於寺之西畚有廣錄諸書行世

第六十四代覺浪禪師諱道盛別稱杖人柘浦張氏子年二十依瑞巖識源師出家從博山無異和尚受具得法於東苑鏡和尚崇禎辛巳曹觀察能始請住當山季秋回廬山之圓通前後坐道場五十餘處順治庚子九月七日遷化於金陵之天界世壽六十有八僧臘四十有九全身塔於攝山棲霞有語錄行世

第六十五代爲霖禪師諱道需建安丁氏子年十五鼓山志

卷四

三

依建州白雲寺深公剃落十八叅聞谷大師密雲和尚歷諸講肆後侍永覺禪師於當山甚久順治丁酉永覺禪師年八十付囑大法戊戌繼席一住十四載恣然上游興剎寶福白雲廣福開元四大刹康熙甲子春衆請還山香花載道四衆皈心禪教兼行淨律並開福緣廣大撰述甚富一時法門之盛人稱古佛再世前後住持三十三載康熙壬午九月初七日午時示寂世壽八十有八僧臘七十有二門人大心奉化身塔於舍利窟之西畚有

譜錄行世

第六十六代惟靜禪師諱道安晉江胡氏子剃落於德化戴雲山叅古杭和尚後至鼓山叅永覺和尚稟具閉關於舍利窟八載爲霖和尚上游舉令繼席住山十載康熙戊辰四月朔日遷化世壽七十有二僧臘四十有二塔於三塔之左有遺語四卷行世

第六十七代恒濤禪師諱大心古莆宋氏子年十三依本郡上生寺德協公剃落二十往黃蘗稟虛白

鼓山志

卷四

三

和尚戒叅侍爲霖和尚二十餘載康熙壬午爲霖和尚將謝世付囑繼席住持二十七載忍辱精進敝衣糲食作懷古十頌其頌隱山曰高隱龍峰世莫攀神光一道自幽閒無端菜葉隨流出引得遊人到此山頌亮座主云大地山河一卷經虛空講得甚分明自從打破虛空後舉世無人識姓名頌大梅云一傳心印便韜光只見四山青又黃及得一朝梅子熟山河大地盡聞香頌龐居士云拶破宗門最上禪明明百草話機先超然物外誰爲侶

獨有毘耶可並肩頌船子云樂情山水孰如君節
操孤標迥不羣一遇金鱗翻釣艇江風山月對溪
雲頌睦州云兩員大器掌中收殺活臨時得自由
黃蘗堂中頻瞌睡眼光燦破閻浮州頌芙蓉楷云
寧昌天威護法門肯沾名利賺兒孫仰止吾師千
載上孤風凜凜起曹源頌清素云一稟師言入衆
藏多年殊未露鋒芒自從一遇冤家後下載清風
付荔香頌高峰云萬仞巖頭自活埋泥牛入海許
誰猜門庭高峻誰能到幾片白雲任去來頌石頭
本山保老洋之正壙

鼓山志

卷四

三

志云獨掩柴門絕世遊綠蘿深處幾經秋誰知文
彩未痕處大抵還他高上流示寂于雍正戊申年
十月念五日世壽七十有七僧臘五十有七塔於
第六十八代圓玉禪師諱興五惠安康氏子雍正戊
申冬恒濤禪師遷化衆延繼席住持六載奉

旨脩藏九月初九日示寂延津天寧塔附保老洋

第六十九代象先禪師諱法印寧化李氏子嗣法圓
玉禪師雍正甲寅衆延住持乾隆己未六月初四

日遷化塔附保老洋

第七十代淡然禪師諱法文沙縣蕭氏子幼依本郡
天寧常青公披剃長叅圓玉禪師得法乾隆庚申
衆延繼席壬戌冬退隱和山丁丑十一月初四日
寂於延津天寧擅詩名有詩集行世塔於平陽山
第七十一代常敏禪師諱法睿古莆楊氏子淡然禪
師退位衆請繼席住持六載退隱長溪辛巳年四
月二十九日遷化於興福寺

第七十二代遍照禪師諱興隆古莆陳氏子幼業儒
鼓山志

卷四

雷

年二十五遊鼓山叅恒濤和尚一見大喜卽投剃
落習楞嚴法華等經雍正庚戌出嶺徧叩江浙諸
宗匠抵燕京叅文覺禪師於覺生寺疑情大發文
覺識之打一竹篋師卽禮拜覺曰子見甚麼道理
師曰某甲不是野狐精覺以手掩其口云離却嘴
作麼道師撥開王云有口只堪喫飯遂呈偈云啞
子喫黃連滿口說不得只是自點頭夏到天氣熱
文覺印之依其座下七載後結茅天台乾隆甲子
罷叅回閩戊辰冬常敏禪師退席己巳春中丞李

公鹿山同明府黃公莘田率省會縉紳延師主席
上堂拈香云此一瓣香不爲花開並蒂只要葉落
歸根乃爲恒濤心和尚拈出上堂云石鼓沒皮蒙
懸挂太虛空一聲轟霹靂大地盡耳聾下座時鼓
山樹木被砍殆盡殿堂屋宇頽廢不堪師住席以
來寢食不寧堅苦勤勞加意培植路松殫力化募
營葺不數年衆緣輻輳百廢俱興自爲霖恒濤禪
師之後振頽舉廢莊嚴佛相重興之功師實居多
焉

鼓山志

卷四

三

已上自唐開山以及

國朝歷有七十二代皆住持本山法席者自宋以前
稱住持者上必奉詔旨降香次必有監司舉請故
鼓山住持皆極一時之選如張德遠李伯紀趙子
直朱晦菴悉相訪於深林僻谷之中蓋其道有足
重也永樂以後由僧綱舉報僧錄給劄其間德不
稱位者咸依舊志刪之不載間有功行超卓真心
輔佐叢林捨己爲衆者毋論本山剃染外來客僧
但有鉅功茂行雖非住持亦載之於後弗遺厥績

以為後來模範云

騰山隆勤舊

閩縣人嘉靖間寺燬僧散蜂房蟻穴請無異和尚開法建佛殿立禪規仍

為十方叢林是師之倡也七月念五日歸寂骨入海會塔

履徵道瑞監院

福清人請無異雪關末覺三位和尚皆師之力也十月初一日歸寂

骨入海會塔

旭華洪曉監院

閩縣人請無異和尚開建叢林及雪關末覺三位和尚輔弼二十餘

年寺宇一新四月二十三日歸寂骨入海會塔

元應感監院

閩縣人

元弼翊監院

福清人

鼓山志

卷四

三

朗元開知庫

山陰人

淨輝炤侍者

建州人末覺和尚時為侍者二十餘年後往金陵請藏還山供於藏殿

復源忠監院

福清人無異末覺雪關覺浪四代和尚住持皆充監院之職輔弼四十餘

年建淨慈菴於烏石山下

事達理侍者

太湖縣人見日輪西墜豁然有悟後隨末覺為霖二位和尚為侍者三十

餘年臨終辭衆坐脫而去

莫遠順監院

建安人執侍末覺和尚二十餘年骨入海會塔

九達宗監院

不知何許人自建千佛菴一座充入常住身任監院輔弼叢林

純一悟監院

長沙人歷事末覺為霖二位和尚監院四十餘年真心實行輔弼叢林整

頽舉廢師
功居多

一 脉源監院

福州人歷事永覺為霖二位和尚監院四十餘年造石橋於上墀鋪砌石

路自水部門外至下院重修舍利窟鑄毀後西方二聖及茶毘時西方三聖現於火光中壬戌夏率眾請為霖和尚還山鼓山重興寶師之力也

默通亨勤舊

六平 副寺

不知何許人依恆濤和尚習法華楞嚴等經在庫司最久僧糧不敷屢往

蒲城石陂募米供衆

默承稟莊主

沙縣人自墾山田十三段晨夕不倦

十日辭衆坐脫而去

鼓山志

卷四

七

真孟譽監院

莆田人恆濤和尚之徒事師極孝歷在監院副寺之職

知有寶藏主

泉州人

無諍讓維那

建州人老成持重三次過臺募米千餘石供衆

王文印監院

惠安人歷任維那監院副寺之職三十餘年柔和忍辱

東來粵監院

六吉謙知庫

載月朗書記

期頂奇維那

慈蔭仁化主

洞然融知客

慈修德勤舊

廣信人

禎祥國監院

建州人歷知客監院之職後出住建州雙石寺

傳心密化主

寧化人六次上游募米供衆歷任悅衆副寺維那知客

論曰沙門以了悟爲宗學其教者皆堅苦清脩脫離塵垢雖其悟有頓有漸然其外形骸以理自勝不爲事物侵亂則一也昔劉屏山語朱子云吾少官莆田以疾病時接佛老之徒聞其所謂清淨寂

鼓山志

卷四

三

滅者而心悅之比歸讀儒書而後知吾道之大體用之全乃如此君子之不囿於方而識所決擇若是也是編所載自神晏來幾及千年猶有嗣其法以相傳者觀其遺外世俗矜然自拔於泥塗皆卓犖可記度亦超曠之士所樂得而傳之歟

鼓山志卷四

終

